

Powšitkowne WOZJEWJENJA

njedźelu, 3. awgusta 2025

Kemše za wučerjow a kublarjow

Wšitcy wučerjo a kublarjo kaž tež něhdyši a přichodni pedagogojo su wutoru, 5. awgusta, we 18.00 hodź. na Božu mšu do Róžanta prošení. Je to poskitk, so w poslednim prózdninskim tydženju tež duchownje a z Božim žohnowanjom na nowe šulske lěto nastajić. Wšitcy su wutrobnje přeprošeni.

Modlenje w Róžeńće

Na Božu mšu a modlenje před Najswjećišim su wěriwi pjatk, 15. awgusta, we 18.00 hodź. do Róžeńčanskeje hnadowneje cyrkwy přeprošeni. Tón dzeń so zdobom Gig-festiwal na samsnym městnje zahaji.

Zastupne lisćiki za pasionske předstajenje online hižo kupić

Za inscenaciju pasionskeje hry „Sćěhuj mje!“ lětsa w septembru w Chrósćicach móža sej zajimcy zastupne lisćiki online kupić. W padže, zo by zarjadowar jednotliwe předstajenje wotprajić dyrbał, wón pjenjezy kupcam wróci. Link na přistup je pod www.posol.de a tam pod wotkazom na pasionsku hru wozjewjeny. Tam su tež plaćizny podate. Na plakatach a flajerach nańdu zajimcy – kaž tule – QR-code na wotpowědnu stronu. Tež při kasy móža sej zajimcy lisćik kupić. Towarstwo Cyrila a Metoda z.t. (TCM) předstaji pasionsku hru zhromadnje z Chrósćanskej wosadu pjatk a sobotu, 5. a 6. septembra, w 19.30 hodź., njedźelu, 7. septembra, w 16.00 hodź., kaž tež sobotu a njedźelu, 13. a 14. septembra, w 19.30 hodź. w Chrósćicach na farskej lúce.

Dekanatny dzeń w Róžeńće

Wšitcy wěriwi su sobotu, 23. awgusta, na zhromadny dzeń Budyskeho dekanata pod hesłom „Marija – znamjo nadźije“ do Róžanta přeprošeni. Liturgiske zahajenje budže w 15.00 hodź. z wustajenjom Najswjećišeho w putniskej cyrkwi. Hižo wot 14.00 hodź. poskićuja wosady kofej, jeli to same organizuja, dokelž so zahe na puć podadza. Štóž chce, móže piknikować. Wot 16.00 do 18.00 hodź. změja zamołwići pisany program wokoło cyrkwy spřihotowany, mjez druhim slackline – to je balansowanje na širokim pasu –, hry ze zmauwacym so rubiškom, paslenje, hermark a džěcacy program. W cyrkwi móža wopytwarjo na hudźbu słuchać. Nimo toho budže tam přiležnosť, sakrament wujednanja w swjatej spowědži přijimać, abo spowědnu rozmołwu wjesć. Dekanatny dzeń skónči so z Božej mšu we 18.00 hodź. w Róžeńčanskej swjatnicy. Tón dzeń předwječorne kemše w serbskich wosadach njebudu.

Zelowa njedźela a swójbny swjedžen

Křesćansko-socialny kublanski skutk z.t. přeprošuje zhromadnje z klóštrum Marijinej hwězdu na zelowu njedźelu do Zežiwjenskeho a zeloweho centruma w Pančicach-Kukowje, kotraž budže 17. awgusta. Zdobom budže to lětsa klóšterski a swójbny swjedžen. Swjedženske kemše w 10.30 hodź. budže Zhorjelski generalny wikar Markus Kurzweil swjećić. Zakónčacy ekumeniski nyšpor ze žohnowanjom zelow, kotryž swjeći mjez druhim fararka Jadwiga Malinkowa ze Slepoho, budže w 17.00 hodź.



Młodostni na dwudnjowsku kubłansku jězbu přeprošeni

Serbskich młodostnych přeprošuje Towarstwo Cyrila a Metoda z.t. (TCM) na jězbu do Dachauwa a Mnichowa. Při tym pónđe mjez druhim wo přesćěhanje Serbow za čas nacionalsocializma, wosebje na přikładže zbóžneho kapłana Alojsa Andrickeho. Bus wotjědže pjatk, 3. oktobra, w 6.00 hodž. Nawrót je za sobotu, 4. oktobra, wokoło 20.00 hodž. planowany. Předwidžane je přeni dzeń popołdnu wodženje po Dachauskim wopomnišću koncentraciskeho lěhwa, hdžež su wjacori serbscy duchowni zajeći byli. Na pózdnim popołdnu je w klóštrje karmelitkow na teritoriju wopomnišća Boža mša skazana. Nazajtra wopytaja wobdžělnicy jězby w Mnichowje pomnik za wopory nacionalsocializma. Wo dalšu wosebitostku so TCM hišće stara. Na zažnym popołdnu so na dompuć nastaja. Jězba z přenocowanjom a zastaranjom płaći 50,00 eurow. Přihotowanske zetkanje budže sobotu, 27. septembra, w 14.00 hodž. w Radworju na farje. Na jězbu přeprošeni su wšitcy zajimowani młodostni, wosebje či, kotřiž budu lětsa do wosadneje młodžiny přiwzaći. Za to měli so woni online přizjewić. Link je pod www.posol.de wozjewjeny.

Wulět młodžiny – po Nysy čołnikować

Serbska dekanatna młodžina je na wulět přeprošena, kotryž budže njedzelu, 24. awgusta. Planowane je z busom do Deška pola Rózborka jěć a wottam po Nysy čołnikować. Wotjězd budže w 12.00 hodž. z Kulowa kaž tež z Chróścic a potom wotpowědnje přizjewjenju po wsach. Plan nańdu zajimcy pod www.posol.de. Tam móža so hač do pjatka, 8. awgusta, přizjewić. Młodostni wróća so wokoło 19.00 hodž. z Rózborka, dóstanu pak do toho wječer, kotraž je z přinoškom za bus a zastup zapłaćena. Přnje džěćo w swójbje ma 25, druge 20 a třěće 15 eurow za wulět zapłaćić.

Gig-festiwal w Róžeńće

Lětuši Gig-festiwal je wot pjatka do njedzely, 15. do 17. awgusta, w Róžeńće planowany. Program kaž tež přehlad wobdžělnikow stej na internetowej stronje festiwala wozjewjenej. Link na nju je pod www.posol.de podaty.

Džěłarnička ikonografije „wobraz a słowo“ za młodostnych

Młodostni, maće lóšt na workshop, wulět a wuměnu z pólskimi młodostnymi? To wšitko móžeće wot pjatka do soboty, 19. do 20. septembra, w „Domje Gerharta Hauptmanna“ w Jelenjej Górje dožiwić. Čehodla džěłarnička ikonografije? Pisanje ikonow słuša k rědkim wuměłstwam. Ikona je uniwersum, wobstejacy z mnohich tradicijow a technikow, kotrež buchu wot generacije ke generaciji na wšelakich městnach a we wšelakich nabožinach dale dawane a hač do džensnišeho posrědkowane. Tuž budžće wotewrjeni a wćipni za nowe impulsy a kulturnu wuměnu mjez młodostnymi. Při přizjewjenju pod sekretariat@sorbisches-museum.de maće mjeno, adresu, starobu a swoje telefonowe čisło podać. Interreg Pólska-Sakska a Euroregion Nysa projekt spěchujetej. Tohodla směće so jako młodostni darmotnje wobdžělić. Wjace informacijow nańdžće na stronje Serbskeho muzeja www.sorbisches-museum.de.
Monika Ošíkova

Serbske kemše w Drježdžanach

Drježdžanscy Serbja – wosebje tež młodzi – su na maćernorěčnu Božu mšu njedźelu, 10. awgusta, w 16.00 hodź. do cyrkwy swjateho Antonija na Bünauskej 10 přeprošeni. Přizamknje so bjesada ze swačinu.

Žarowanski kruh Carity – jedyn za dźěći, druhi za dorosćenych

Hospicna služba Hornjołužiskeho zwjazka Carity z.t. přeproša na žarowanskej kruhaj, kotrejž zahajitej so štwórtk, 18. septembra. Jedyn je za dźěći, druhi paralelnje za dorosćenych mysleny. Wobaj trajetej stajnje wot 16.00 do 18.00 hodź. Přenje zetkanje budže w rumnosćach zwjazka Carity w Kamjencu na Zapadnej 22. Zajimcy měli so za kurs, kotryž přewjedže so z dźesać zetkanjemi něhdze do srjedź lěta 2026, do toho telefonisce pod čisłom (0 35 78) 37 43 12 abo z mailku pod adresu Hospiz@Caritas-Oberlausitz.de přizjewić.

Relikwiar swjateje Terezy z Lisieuxa w Budyšinje

Składnostnje lětušeje 100. róčnicy swjatoprajenja swjateje Terezy z Lisieuxa (1873–1897) budže relikwiar, pućowacy po cyłej Němskej, z někotrymi jeje smjertnymi powostankami wot srjedy do pjatka, 17. do 19. septembra, w Drježdžansko-Mišnjanskim biskopstwje. Wšitcy wěriwi su přeprošeni relikwije česćować, na přikład sami čicho, abo so k modlenju a Božim službam zhromadzić. Přenja planowana stacija je Budyska cyrkej Našeje lubeje Knjenje, dalša budže cyrkej swjateho Antonija w Drježdžanach-Löbtau a jako poslednja wosada swjateje Terezy w Flöha. W Budyšinje budže srjedu, 17. septembra, we 18.00 hodź. mjez druhim nyšpor za wšitkich serbskich wěriwych z duchownymi impulsami a wujasnjenjemi. Nazajtra, štwórtk, 18. septembra, w 9.00 hodź. swjeća Božu mšu w cyrkwi Našeje lubeje Knjenje za wšěch wěriwych. Na česćowanje su wuraznje tež wěriwi z druhich wosadow přeprošeni.

Ministrantska kopańca

Koparski turněr ministrantow ze serbskich wosadow budže sobotu, 30. awgusta, w Pěskecach. Započatk je w 9.00 hodź. z Božej mšu we wjesnej kapałce.

Počesća třoch Zejičanow

Zejičanska wjesna zhromadnosć, Maćica Serbska z.t. a Towarstwo Cyrila a Metoda z.t. přeprošuja wšitkich na poswjećenje pomnika za prelata a čestneho kanonika Jakuba Buka, kanonika Michała Buka a kanonika Jakuba Šubu. Wšitcy tři su rodzeni Zejičenjo. Chróšćanski farar Měrcin Deleńk poswjeći pomnik, kotryž změje swoje městno při wjesnym swjatym křižu, njedźelu, 24. awgusta, w 15.00 hodź. Farar Beno Jakubaš wosobiny předstaji. Cyrkwinski chór a dujerjo Chróšćanskeje wosady swjatočnosť wobrubja. Po njej su wšitcy na swačinu přeprošeni. Awta smědža na parkowanišću při křižowanišću wotstajić.